

26/02/2003

Malaysia dapat pujian delegasi

KUALA LUMPUR: Ramai pemimpin NAM memuji kecekapan Malaysia mengendalikan sidang kemuncaknya kali ini, malah sesetengahnya menganggap antara terbaik dalam sejarah 48 tahun kewujudan pergerakan itu.

Mereka turut memuji pengerusi baru NAM, Datuk Seri Dr Mahathir Mohamad yang diyakini boleh menyuburkan semula pergerakan 116 negara itu serta tertarik dengan kecantikan bandar raya Kuala Lumpur.

Perdana Menteri Jamaica, P J Patterson yakin keberanian dan pengalaman luas Dr Mahathir untuk memacu NAM dalam keadaan dunia yang tidak menentu.

"NAM dilahirkan 48 tahun lalu bagi mempertahankan kebebasan kita dan kini ia berada di tangan (Dr Mahathir) orang yang lebih berupaya," katanya pada sidang pleno pagi semalam.

Presiden Lubnan, Rafik Hariri dalam ucapan pada sidang yang sama mengucapkan penghargaan tinggi kepada Malaysia kerana layanan yang begitu mesra, keramahan rakyat dan kecantikan Kuala Lumpur.

"Bagi pihak rakyat Lubnan, saya puji Malaysia yang menjadi tuan rumah terbaik dengan keupayaan rakyat serta kebijaksanaan pemimpinnya," katanya.

Presiden Cuba, Fidel Castro, dalam pembukaan kata aluannya pada ucapan yang agak keras terhadap negara Barat, menyifatkan Dr Mahathir sebagai "kawan saya".

Perdana Menteri Papua New Guinea, Michael T Somare, pula sambil mengucapkan tahniah kepada Dr Mahathir dan Malaysia, berikrar untuk memberi sokongan penuh sepanjang rakan sejawatnya itu menyandang jawatan pengerusi NAM.

"Malaysia adalah panduan dan model kepada kita semua. Saya ucap tahniah kepada Dr Mahathir dan yakin bahawa usaha penyuburan NAM di bawah kepemimpinannya akan menjadi lebih efektif," katanya.

Presiden Tanzania, Amani Abeid Karume, berkata pemilihan Dr Mahathir sebagai pengerusi NAM amat tepat sekali dan berupaya memulihkan imej NAM ketika keadaan dunia agak kritikal.

Pemimpin Korea Utara, Kim Yong Nam, berkata penghargaan harus diberi kepada kerajaan dan rakyat Malaysia yang melakukan segala usaha bagi menjamin kejayaan sidang kali ini.

Timbalan Perdana Menteri ketiga merangkap Menteri Luar Uganda, James Wapakabulo, berkata pihaknya yakin kepemimpinan Dr Mahathir akan membawa momentum lebih baik kepada NAM untuk menghadapi cabaran masa kini dan akan datang.

Naib Presiden Malawi, Justin Malewezi, berkata NAM di bawah kepemimpinan Dr Mahathir dijangka berupaya mencapai banyak lagi kejayaan.